



Nuuk, 19. december, 2014

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga

Apeqqutit:

- 1) Pituffimmi sullissinissaq pillugu isumaqatigiissut Naalakkersuisoqarfimmit sorlermit oqartussaaffigineqarpa? Akisussaaffigisaq Naalakkersuisoqarfiit arlallit oqartussaaqataaffigippassuk taava qanoq agguataagaava?
- 2) Suliamut tunngatillugu Namminersorlutik Oqartussat Naalakkersuisoqarfiisa akornganni taavalu Namminersorlutik Oqartussat danskillu naalagaaffiata akornganni qanoq attaveqatigiittoqarsimava?
- 3) Danskit naalagaaffiat Naalakkersuisunut ilimasaarummik saaffiginnissuteqarsimava? Taamaassimappat qanga qanorlu oqariartuuteqartumik? Saaffiginnissutigisimasinnaasaq taama ittoq Naalakkersuisut qanoq suliarivaat?
- 4) Suliap inuiaqatigiinnut kalaallinut, imaappoq aningaasarsiornikkut, lærlinge qarnikkut, praktikkertoqarnikkut allatigullu kinguneri pillugit Naalakkersuisut qanoq naliliippat?
- 5) Naalakkersuisut isumaqarpat ingerlatsiviup sullissinissaq pillugu isumaqatigiissummik pinnattup kalaallinit danskinilluunniit pigineqarani amerikarmiunit pigineqarnera pissusissamisoortoq?
- 6) Isumaqatigiissutip kalaallinit/danskinit tigummiinnarneqarnissaa tapersorlugu Naalakkersuisut arlaatigut suliniarsimappat aammalu inuiaqatigiinnut kalaallinut suliassatigut isertitassatigullu ajunngitsorsiasaqartitsiuaannarnissaq pillugu piumasaqaateqartoqarsimava?
- 7) Sammisaaq Permanent Committee-mi oqaloqatigiittarfimmiluunniit allami naleqquttumi Naalakkersuisunit qaqinneqarlunilu malersorneqarsimava? Taamaassappat qanoq qangalu?
- 8) Naalakkersuisut isumaqarpat sullissinissaq pillugu isumaqatigiissummik tunniussinermut atatillugu piumasaasut tamarmik naammassineqarsimasut?
- 9) Naalakkersuisut qularinngilaat isumaqatigiissutit atuuttut malittuinnarneqarlutillu akileraarutitigut isertitat qaffasissusaat siunissami maannamutut allannguuteqassanngitsoq?
- 10) Lærlingit sulliviisa amerlassusiat allanngussanngitsoq Naalakkersuisut qularinngilaat?
- 11) Qineqqusaarnerup nalaani taamanikkut Aningaasaqarnermut Naalakkersuisuugallartoq Nuuk TV-mut oqarpoq suliaq pillugu

Naalakkersuisutut ilisimatinneqarsimanani. Taavami suliaq pillugu aningaasaqarniarnikkullu kinguneri pillugit Naalakkersuisunut ilaasortat kikkut ilisimatinneqarsimappat?

- 12) Suliamut atatillugu oqaaseqaammini Naalagaaffiup Eqqartuussissuserisua allappoq ingerlatsivinnut akuersissummik tunniussisarnermut atatillugu piumasaqaatip attanneqarnissaa pillugu illersorlugu assortorlugulu tunngavilersuisoqarsinnaasoq taavali suliamut tunngatillugu Folketingimi ammasumik isumasioqatigiinnermi danskit nunanut allanut ministeriat arlaleriarluni oqartartoq ingerlatsivinnut akuersissummik Danmarkip tunniussisarunnaarneranut EU-p inatsisai pissutaasut. Suliaq tunngasortaanut tassunga Naalakkersuisut qanoq isumaqarpat?
- 13) Suliaq tamanna iluarsiniarlugu siunissamut sammisumik Naalakkersuisut qanoq tigussaasunik alloriaateqarniarpat?

(Inatsisartunut ilaasortaq Sara Olsvig, Inuit Ataqtigiit)

Tunngavilersuut:

Pituffimmi sullissinissaq pillugu isumaqatigiissummut atatillugu suliaq qineqqusaarnerup nalaani pitorarpoq. Naalakkersuisut suliamut tassunga atatillugu malunnartumik nipaassimapput. Allaammi Naalakkersuisunut ilaasortat ilaat oqarpoq suliaq ingerlanera pillugu ilisimatinneqarsimanani. Suliaq Folketingimi annertuumik ukkatarineqarsimavoq. Kalaallit Nunaannut tunngatillugu Ataatsimiititaliaq ammasumik isumasioqatigiissitsivoq, tassanilu nunanut allanut ministeri ilaatigut oqarpoq sullissinissaq pillugu isumaqatigiissutip tamatigut isumaqatiginninniutigineqarnerata nalaani Naalakkersuisut qanimut akuutinneqarlutillu ilisimatinneqarsimasut. Folketingi maanna aalajangernikuuvoq suliamut tunngatillugu tuaviortumik januarimi isumasioqatigiissitsisoqassasoq. Februarip ulluisa 20-at tikillugu eqqartuussisunut annerusunut suliassanngortitsisoqarsinnaavoq, USA-mi eqqartuussivimmuut maalaaruteqartarfimmuut immikkut ittumut ingerlatsiviit sullissinissaq pillugu isumaqatigiissummik pinnangitsut maalaarfigisimasaannut. Suliaq pillugu Naalakkersuisunik toqqartumik oqaloqatigiinnissaq Inuit Ataqtigiit kissaatigisimavaat kisiannili Naalakkersuisut siulittaasuannik aammalu Nunanut Allanut Tunngasunut Naalakkersuisumik Inatsisartut Nunanut Allanut Sillimaniarnermullu Ataatsimiititaliami isumasioqatigiinnermut amerlanerussuteqartitsiniarluta aggersaanissamut iluatsitsisinnaasimanata. Isumaqarpugut suliame matumani Inatsisartut paasissutissat kingulliit ilanngullugit tamakkiisumik ilisimatinneqarnissaat pingaaruteqarluinnartuusoq, kiisalu suliame tassani Naalakkersuisut inassisimanerat qulaajarneqartariaqartoq. Piaarnerpaamik pisortatigoortumik nalunaaruteqartoqassasoq naatsorsuutigaarput. Apeqquterpassuit akineqanngittuarsinnartut inunni ataasiakkaani, suliffeqarfinni kikkunnilu tamani Nunatta Karsiata siunissaanik eqqasuuteqarnermik pilersitsipput.

Ullut suliffiusut qulit qaangiutsinnagit apequtit akeqquneqarput.